

COVID-19: RM600juta beli peralatan perubatan, lantik kakitangan KKM baharu

AstroAwani

23 Mac 2020

Firdaus Azil,

PUTRAJAYA: Kementerian Kesihatan Malaysia (KKM) akan diberi peruntukan tambahan RM500 juta bagi membiayai pembelian peralatan perubatan, dalam usaha menangani impak wabak COVID-19, kata Tan Sri Muhyiddin Yassin.

Menurut Perdana Menteri, selain itu, kerajaan juga akan menyalurkan peruntukan RM100 juta khusus untuk pelantikan 2,000 kakitangan baharu KKM secara kontrak.

“Peruntukan (RM500 juta) ini antara lainnya akan digunakan untuk membiayai pembelian peralatan perubatan seperti ventilator dan peralatan ICU (unit rawatan rapi), peralatan perlindungan diri (PPE) tambahan bagi kakitangan perkhidmatan perubatan awam serta keperluan makmal untuk saringan COVID-19.

“Untuk menyegerakan pembelian barangan kritikal, kerajaan telah meluluskan tatacara perolehan secara darurat,” katanya dalam sidang media khas di Bangunan Perdana Putra hari ini.

Keputusan itu dicapai selepas beliau selesai mempengerusikan mesyuarat Majlis Tindakan Ekonomi (EAC) hari ini, khusus untuk membincangkan keperluan mendesak dalam membantu rakyat menangani impak COVID-19.

Berkenaan peruntukan khas untuk kakitangan baharu itu, Muhyiddin berkata, kerajaan sedar jururawat dan kakitangan hospital amat keletihan terpaksa bekerja siang dan malam untuk membuat saringan kes COVID-19 dan merawat mereka yang disahkan positif.

“Saya berharap pengambilan kakitangan baharu ini dapat dibuat dengan segera 5 supaya semua hospital di negara kita mempunyai kakitangan yang mencukupi untuk menangani penularan wabak COVID 19,” tambah Muhyiddin lagi.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/covid-19-rm600juta-beli-peralatan-perubatan-lantik-kakitangan-kkm-baharu-234866>